

in bonaza, fo discoperto zerte nostre velle veniva di ponente a la larga, foli mandà do galie in contra per segurtà, le qual agionseno a nui a hore 8 de di, e fu do galie sotil, misier Valerio Marzelo e misier Zuam Malipiero, la nave Malipiera patron Domenego Bianco con provisionati 170 e tre caravelle armade in Schiavonia, per le qual velle se ebbe lettere di vostre magnificentie de di 16 et 17 lujo tutte gratissime, et in quel zorno nui asorzessemo al Zonchio le nave con le galie grosse in su le volte, et dice di altre lettere ricevute, etc.

*A di 9 ditto a hore 9 de di.* Vene da Venexia uno barzoto de i Memi armado con provisionati 150 e una marziliania patron Zaneto da Muran per Candia con 9 homeni, per la qual se ebbe una lettera de di 23 lujo del magnifico misier Marcho Foscolo in recomandation de ditta caravela, a qual porete far intender per lo grande amor sempre ha portato e porta la magnificencia di misier a sua magnificencia e tutta caxa sua, tanto quanto per ditta lettera sua magnificencia rechiedevà meritamente *sine mora* fu exequito, e tanto più per lo imenso amor la magnificencia di misier porta al magnifico misier Marin da Leze qual richiese lo simile, et è amato come fiol 477 e zeneralmente da tutta l'armata, per le degne parte regna in soa magnificencia.

*A di ditto se hebe lettere dal magnifico rezimento de Corphi de di 4 ditto.* Come la magnificencia di misier Andrea Loredan havea deliberato di andar a Lepanto con provisionati et 11 gripi armati.

*A di ditto, a hore do di note.* Zonse misier Alvix Orio sopracomito, per el qual se hebbe una lettera di misier Donado Marzelo de di 21 lujo gratissima a la magnificencia di misier, al qual da parte soa ringraziarete.

*A di 10 ditto a hore meza de di.* L'armata turchescha ussi, ma fu a fine che nui se levasemo, et ponessimo in mare et l'horo venir al nostro locho, et fense di far lo ritorno.

*A di ditto, a sol a monte.* Azonse do barze biseaine veniva di Rhodi, et fu quelle che ne l'andar a Rhodi e Modom promise a la magnificencia di misier per la bona compagnia dolze parole, et promese che non andando l'armata turchescha a Rhodi veniriano in nostro ajuto insieme con altre, le qual barze sono di bote 300 in 350 con homeni 100 per una, et oltra 130 provisionati valenti homeni et ben in hordine, acordade in questo modo per lo reverendissimo gran maestro di Rhodi a nome di la nostra illustrissima Signoria, zoè per cadauna barza con li soi homeni ducati 550 al mexe principiando

el mese al suo partir da Rhodi che fo a di 11 lujo *in super*, li 130 provisionadi do capi, uno de ducati 15 l'altro 6 al mexe, el resto ducati tre principiando el primo di de avosto, di che la magnificencia di misier li accettò et carezoli. *Item*, che tutti rimaseno satisfati con ogni celerità, *etiam* di farli dar tavole et maistranze per adatar ditte sue barze, et altre molte comodità.

*A di ditto.* E fu la note avanti, et tutto il giorno per il disordine seguiva et haveria potuto seguir per il star su le volte le nave et galere grosse, la magnificencia di misier al tutto terminò, insieme perhò con li altri: che tutte dovesseno venir a sorzer a la punta del Prodano ch'è fuora, locho al proposito et sicuro et sora vento, et cussi fu fato.

*Item*, fo scripto al Zonchio, et datoli li segni dovesseno tenir sì del levar di l'armata come del successo.

*A di ditto, per le lettere di Modon de di 9.* Insieme con uno schiavo scampato de l'armata turchescha: afferma come a di 7, che fu il zorno che si levò l'armata, et nui come di sopra è ditto, nel ritornar in freta una de le tre sue nave grosse quella di bote 1000 calò a fundi con anegation del tutto et parte de li homeni, era suso 800 caratelli de polvere, do morteri, et altre monition etc. Et fu confirmata di la verità per il trovar di una cheba et legni in mare per le nostre nave.

*A di 11 ditto a hore do di note vene lettere da Modon de di ditto.* Come una caravela veniva da Venexia per Candia con homini 10 sora il Zonchio, velizando, ussi certe galie et fuste del Turchi che fugava ditta caravella lontan da Modon mia 4, et manchò prenderla, li homeni se asegurò lassò la caravella, et se disse esser di misier Zustignam.

*A di 12.* A l'alba l'armata dil Turchi si levò con bonaza venendo verso nui a terra via, di che insieme la magnificencia di misier con li magnifici provedadori, vedendo si meteva provenza et esser il zorno di far fati et conseguir victoria, fu remurchiato tutte le nave al vento ad uno, et le galie grosse, dadi a tutti li soi ordeni di bataglia, li quali per altre mie ho mandati a vostre magnificentie, salvo quelli de le galie grosse, che era questi che tutte le galie grosse divise a li do capitani dil tra- 477 fego et di Barbaria, con ogni pena di obedientia, li qual capitani dovesseno far per setimana, et azio dicti capitani dovesseno haver total obedientia li fu dà podestà che come le nave principiaseno a investire, tutte le galie grosse per squadra lo simile fazino in: quelli picoli, et altri polito et securi ordeni.